

7. oktober 2008

UKA 2008/67

**Aningaasarsianit akileraarutit pillugit inatsisartut inatsisaata  
allanngortinneranik Inatsisartut inatsisissaattut siunnersuut**

**pillugu**

**ISUMALIUTISSIISSUT**

**Inatsisartut Akileraartarnermut Akitsuusiisarnermullu Ataatsimiititaliaannit  
saqqummiunneqartoq**

**Siunnersuutip aappassaaneerneqarnerani saqqummiunneqartoq**

Inatsisartut Akileraartarnermut Akitsuusiisarnermullu Ataatsimiititaliaat  
suliarinninnermini ukuninnga inuttaqarpoq:

Inatsisartunut ilaasortaq Emilie Olsen  
Inatsisartunut ilaasortaq Aleqa Hammond  
Inatsisartunut ilaasortaq Isak Davidsen  
Inatsisartunut ilaasortaq Esmar Bergstrøm  
Inatsisartunut ilaasortaq Palle Christiansen

Siunnersuutip siullermeerneqarnera tunngavigalugu Akileraartarnermut  
Akitsuusiisarnermullu Ataatsimiititaliaap siunnersuut una misissuataarpaa.

**Siunnersuutip imarisaa**

Inatsisissatut siunnersuut maleruagassanut atuuttunut sanilliullugu allannguutininik  
pingasunik imaqarpoq:

Siullertut inatsisinik avaqqussisinnaanermik periarfissaqarnerup matuneqassaaq,  
taassuma nunani allani ernianut aningaasartuutit Kalaallit Nunaanni  
aningaasarsiarineqartunit akileraartartumit ilanngaataalersinnaanera  
malitsigissallugu. Aappaatullu inuit umiarsuarni timmisartunilu sulisartunut  
tunngassuteqartoq erseqqissarneqarlunilu annertusineqassaaq, tamanna  
suliassaqarfimmi inatsisitigut maleruagassat ersarinnerusut pilersinnissaat aammalu  
akileraarutinit iluanaarutissat ikiliartortinnissaannut periarfissaqarnermik

akiuiniarneq siunertaralugu. Pingajuattut suliffeqarfiit sermimik imermillu ujarlerlutillu avammut niuernissaq siunertaralugu iluaqutiginninnissamut akuerineqartut suliffeqarfinnut aatsitassat pillugit inatsit naapertorlugu ujarlermut iluaqutiginninnissamulluunniit akuerineqartunut akileraarutitigut naligititaalissasut siunnersuutigineqarpoq.

### **Siunnersuutip Inatsisartuni siullermeerneqarnera**

Siunnersuut siullermeerinermi Siumumit, Atassummit, Demokraatinit aamma Kattusseqatigiit Partiiannit taparserneqarpoq.

Siunnersuutip ilaa suliffeqarfiit sermimik imermillu ujarlerlutillu avammut niuernissaq siunertaralugu iluaqutiginninnissamut akuerineqartut suliffeqarfinnut aatsitassat pillugit inatsit naapertorlugu ujarlermut iluaqutiginninnissamulluunniit akuerineqartunut akileraarutitigut naligititaalernissaannut tunngasoq **Inuit Ataqtigiinnit** taparserneqanngilaq. Tamanna kommunit isertitassatigut ikilisaaffigineqartariaqannginnerannik isumaqarnermit aallaaveqarpoq.

Siunnersuut **Demokraatit** taparserpaat, inatsimmili "avaqqunneqarsinnaasoq" siuliani taaneqartoq innersuussutigalugu apeqqutit tulliuttut akineqarnissaat kissaatigineqarpoq:

1. Akileraartarneq pillugu inatsimmi avaqqunneqarsinnaasoq taanna qanoq sivisutigisumik piusimava ?
2. Akileraartarneq pillugu inatsimmi avaqqunneqarsinnaasoq taanna ilisimaneqalersoq patsisaalluni kalaallit inuiaqatigiit aningaasanik qanoq amerlatigisunik annaasaqarsimappat ?
3. Aningaasat annaaneqarsimasut nunatta karsianut akilersinniarneqarnissaat Naalakkersuisunit siunertarineqarpa?
4. Aningaasat annaaneqartut naalakkersuinikkut kimit akisussaaffigineqarpat ?
5. Nunatta karsianit aningaasanik amerlanerusunik annaasaqarqittoqaqqunagu akileraartarneq pillugu inatsisip sinneranik nutarterineq Naalakkersuisunit aallartinneqarsimava ?

Apeqqutitut siulianiittunut Naalakkersuisut akissuteqaataat isumaliutissiisummut matumunnga ilanngussatut ilanngunneqarput.

Saqqummiussissutit inatsissatullu siunnersuutit kalaallisuuini qulequttat akornanni assigiinngissuseqartoqartoq ataatsimiititaliap paasivaa. Atortussat Inatsisartunut saqqummiunneqartussat suliarineqarneranni annertunerpaamik mianersuussilluartoqartarnissaa ataatsimiititaliamit inassutigineqassaaq.

Ikinnerussuteqartutut oqaaseqaat kingulianiittoq isumaliutissiisummut ilanngunneqassasoq **Inuit Ataqtigiit** kissaatigaat:

"Inuit Ataqtigiit ikinnerussuteqartutut oqaaseqaataat: siunnersuutip ilaa suliffeqarfiit sermimik imermillu ujarlerlutillu avammut niuernissaq siunertaralugu

iluaqutiginninnissamut akuerineqartut suliffeqarfinnut aatsitassat pillugit inatsit naapertorlugu ujarlernermit iluaqutiginninnissamulluunniit akuerineqartunut akileraarutitigut naligititaalernissaannut tunngasoq Inuit Ataqtigiit tapersinngilaat. Tamanna kommunit isertitassatigut ikilisaaffigineqartariaqannginnerannik isumaqarnermit aallaaveqarpoq, inatsimmi avaqqunneqarsinnaasut periarfissaajunnaartinneqarnissaannut siunnersuutip tunngasortaa Inuit Ataqtigiinnit tamakkiisumik taperserneqarpoq.

Kommuninut aaqjissuussaannermik nutaamik akuersissuteqaqqammerpugut, tamatumani Namminersornerullutik Oqartussat suliassanik amerlanerusunik kommuninut nuussissallutik, suliassallu nuunneqartut tamangajammik aningaasartuuteqarfiusariaqarput kommunillu ima inissisimasariaqarlutik suliassat isumaginissaannut akissaqarlutik.

Suliassat sorliit kommuninut tiguneqassanersut pillugu Naalackersuisut maannamut oqaaseqaateqanngillat, oqaaseqaateqarlutillu kingusinnerusukkut tamanna paasineqassasoq. Naalackersuisut maanna pilersaarummik suliaqartariaqartut Inuit Ataqtigiit isumaqarput, taamaalilluni suut tiguniarnerlugit, qanoq aningaasartuuteqassanerlutik kiisalu isertitat suut naatsorsuutigisinnaanerlugit kommunit ilisimaniassammassuk.

Aningaasartuutit inuiaqtigiinni karsimit inuiaqtigiinni karsimut allamut nuussinerinnakkut inuiaqatiigiittut sipaaruteqarnavianngilagut.

Aammattaaq aningaasartuutit inuiaqtigiinni karsimit inuiaqtigiinni karsimut allamut nuussinitsigut isertitagut amerlinavianngilat".

Aappassaaneerinninnermut allannguutissatut siunnersuummik saqqummissusilersarlutik Naalackersuisut nalunaarutigaat. Aningaasarsianit akileraarutit pillugit inatsisip oqaasertalersorneqarnerata qallunaat kalaallillu akornanni marloriaammik akileraarusigaannginnissamik isumaqtigiissummut nutaamik ilassutaasumut naleqqussarneqarnissaa alannguutissatut siunnersuutip siunertaraa .

### **Akileraartarnermut Akitsuusiisarnermullu Ataatsimiititaliap innassuteqaataa**

Allannguutissatut siunnersuummi aappassaaneerinninnermut saqqummiunneqartussatut nalunaarutigineqartumi allassimasutut iluseqartillugu siunnersuut **akuersissutigineqassasoq ataatsimiititaliami amerlanerussuteqartut Siumumeersut, Demokraatineersut Atassummeersullu** inassutigaat.

Siunnersuut itigartitsissutigineqassasoq **ataatsimiititaliamit ikinnerussuteqartut Inuit Ataqtigiinneersut** inassutigaat.

Taama oqaaseqaateqarluni Akileraartarnermut Akitsuusiisarnermullu Ataatsimiititaliap siunnersuut Inatsisartunut aappassaaniigassanngortippaa

Emilie Olsen

Aleqa Hammond

Isak Davidsen

Esmar Bergstrøm

Palle Christiansen

[Ilanngussaq](#)